

摩訶般若波羅蜜多心經

觀自在菩薩行深般若波羅蜜多時照見五  
蘊皆空度一切苦厄舍利子色不異空空不  
異色色即是空空即是色受想行識亦復如  
是舍利子是諸法空相不生不滅不垢不淨  
不增不減是故空中無色无受想行識无眼  
耳鼻舌身意无色聲香味觸法無眼界乃至  
无意識界无无明亦无无明盡乃至無老死  
亦無老死盡无苦集滅道无智亦无得以无  
所得故菩提薩埵依般若波羅蜜多故心無  
罣礙无罣礙故無有恐怖遠離一切顛倒夢  
想究竟涅槃三世諸佛依般若波羅蜜多故  
得阿耨多羅三藐三菩提故知般若波羅蜜  
多是大神咒是大明咒是无上咒是无等等  
咒能除一切苦真實不虛故說般若波羅蜜  
多咒即說咒曰

揭諦揭諦波羅揭諦波羅僧揭諦菩提薩婆訶

般若心經